

# 7 PENARI UPM WAKILI NEGARA

....Peluang menyertai World Folkdance Festival 2001 bagaikan mimpi. Ikuti catatan perjalanan NOR HASLINA MOHAMED, salah seorang peserta yang menyertai festival tersebut



Selepas pertunjukkan Kebudayaan di Dewan Francisco Mallorca, Sepanyol



Di atas jambatan, berlatarbelakangkan Big Ben, salah satu mercu tanda Bandaraya London, England

**“MACAM MIMPI JE! Tak sangka impian selama ini untuk menjejakkan kaki ke luar negara tercapai juga. Apatah lagi mewakili negara pulak tu...”** Itulah antara ungkapan yang berlegar dalam benak fikir kami yang baru saja memijak kaki di negara asing.

Betul kata orang, hujan emas di negeri orang, hujan batu di negeri sendiri, lebih baik rasanya di negeri sendiri. Mana tidaknya, kalau hendak makan pun terasa jerih, inikan pula hal-hal besar seperti perbezaan adat resam dan budaya. 3 hari di London, England dan 9 hari di Palma De Mallorca, Sepanyol bersama rakan-rakan yang mewakili Universiti Putra Malaysia dan negara Malaysia sudah cukup untuk mengajar erti ‘hujan emas’.

Segalanya bermula apabila kami mengambil keputusan untuk menerima tawaran daripada Kementerian Kebudayaan, Kesenian Dan Pelancongan Malaysia untuk menyertai satu Pertandingan Tarian Tradisional ‘World Folkdance Festival 2001’ di Palma De Mallorca, Sepanyol bermula 13 - 25 April 2001.



Kafe Siber di London.. penulis menghantar email kepada penganjur untuk memberitahu tentang kehadiran wakil UPM

Nor Haslina, Nur Baeyah, Mohd Adnan, Intan Suzana, Siti Hasnoor, Ismawardy dan Tomo Hardjo, masing-masing terasa seperti mimpi untuk mejejakkan kaki ke luar negara akan menjadi kenyataan. Tapi kami terpaksa bekerja keras untuk pergi kerana semua perbelanjaan ditanggung oleh kami sendiri.

Kami perlu keluar untuk mencari ‘sponsor’. Tapi demi keinginan untuk mewakili universiti dan Malaysia, kami berusaha bersungguh-sungguh dari segi latihan dan perbelanjaan untuk ke sana. Kami amat-amat bersyukur kerana pihak keluarga Jabatan Kebudayaan Dan Kesenian Negeri Selangor telah banyak membantu dan memberikan sokongan fizikal dan mental kepada kami terutama sekali Pengarah Jabatan, Puan Semaini Pien.

Kami bertolak dari Malaysia pada 13 April 2001 jam 9.00 pagi. Festival bermula pada 16 April 2001. Kami terpaksa mengambil penerbangan awal, SIA kerana jadual penerbangan penuh. Kami bertolak dari KLIA ke Singapura dan Singapura ke London. Perjalanan yang terlalu lama, 13 jam membuatkan kami tak senang duduk di dalam penerbangan. Kami transit di London selama 3 Hari 2 malam dan apa lagi, kami mengambil peluang keemasan ini untuk melawat tempat-tempat menarik di Bandar London.

Kami tiba di Heathrow, London tengah malam 13 April 2001. Kami mempunyai masalah kerana tiada siapa pun yang menjemput kami di sana. Kami menempah bilik hotel daripada airport dan terus ke sana dengan menaiki tube, kenderaan utama penduduk di London. Ianya seperti LRT tetapi semuanya berada di bawah tanah. Kami tersesat juga ketika hendak ke hotel, tapi alhamdulillah, sampai jugak ke Generator Hotel. Mahal beb, RM 175 seorang untuk 2 malam. Disebabkan perubahan masa dan cuaca yang ketika itu, 7 darjah Celsius, kami menghadapi masalah untuk melelapkan mata dan kesejukan, maklumlah di Malaysia siang, di sini malam.

Tapi disebabkan kepenatan yang amat sangat kami terlelap jua. Bangun pagi, perut terasa lapar. Nasib baik kami disediakan sarapan pagi. Almaklumlah, kita ni kan orang Melayu, mana pagi-pagi nak makan cereal dengan susu. Tapi lapar punya pasal, jadi Mat Saleh le jap. Sekali lagi timbul masalah, makanan

semuanya non-halal. Jadi apa lagi, mee maggi dan Brahim ‘Ready To Eat Food’ yang kami dapat sponsor dari Malaysia sahaja makanan yang kami makan bersama dengan roti. Sabar je le.

Lepas sarapan, kami terus keluar ke Bandar London untuk berjalan-jalan. Cuaca mak oii, sejuk gila. Pakai baju sampai tiga empat lapis. Tak tahan sejuk. Tapi demi peluang keemasan yang tak dapat dilepaskan ini, kami tak kisah. Kenderaan tidak menjadi masalah, cuma bayaran yang dikenakan terlalu mahal. Kami hanya menaiki tube untuk ke sana ke mari. Tapi apabila melihat permandangan kota London, bangunan yang antik dan bas dua tingkat mengamit kami. Cahaya lensa kamera lip lap lip lap mengabadikan kenangan kami.

Tidak lupa juga, kami singgah di Malaysia Hall. Ramai rakyat Malaysia kami temui di sana. Setelah 3 hari tak bertemu dengan nasi, apa lagi, kami terus makan dengan selernya di satu-satunya Restoran Melayu yang berada di tingkat bawah Malaysia Hall. Puas rasanya. Asyik makan makanan mat saleh aje, mana tahan perut. Layanan mereka kepada kami sungguh baik dan kami telah menjadi seperti satu keluarga. Mereka banyak menolong kami sepanjang kami berada di sana dan jasa kalian tidak akan kami lupakan.



KELETIHAN...Menaiki tube dalam perjalanan dari Airport Heathrow ke Russel Square (tempat penginapan)

(Bersambung di keluaran akan datang)